

Mohoo oa ABC/Kobo-Tata Mabapi le
Likhetho tsa Naha tse Akaretsang tsa 2012



LA CHABA LETSATSI

Kobo-Tata ea Basotho



“Sera sa Motho ke Tlala”

Selelekela ka Moetapele oa ABC/Kobo-Tata	2
Lintlha tsa Boiketlo tsa ABC/Kobo-Tata ea Basotho likhethong tse akaretsang tsa Naha tsa 2012:	
Karolo ea pele:	4
A. Tšebeliso 'moho le Borena ka mafapha a bona le ho hlompha Borena ba Lesotho.	4
B. Meralo e hlakileng ea kabo le kamoho ea mobu molemong oa Sechaba Naha ka kakaretso.	4
C. Tšebetso temong le thuong ea liphoofole (lihoai).	5
D. Thibelo le toantšo ea bosholu.	6
E. Ntlatfatso ea toka, tšireletso le puso e ntle.	6
F. Paballeho ea tikoloho le lihloiloeng.	7
G. Tšebeliso 'moho le ba ikarabellang ho tsa Meetlo le Bo-kreste.	8
Karolo ea bobeli:	9
A. Katamelo ea ABC/Kobo-Tata ho batho ba nang le bokooa.	9
B. Katamelo ea ABC/Kobo-Tata ho litaba tsa Bacha.	10
C. Bophelo bo botle le boiketlo ba Sechaba.	11
D. Ntlatfatso ea thuto.	12
Karolo ea boraro:	13
A. Bosebeletsi ba Sechaba 'Musong.	13
B. Tsa khiri le bosebetsi ba batho ba sebetsang lekhoebong tse ikemetseng, lifemeng esita le malapeng.	14
Karolo ea bone:	15
A. Komiti ea meralo ea Ntšetso Pele ea Naha (National Planning Board).	15
B. Ntlatfatso le kholiso ea moruo molemong oa Basotho.	15
C. Kaho ea litšiea tsa moruo esita le tlhahiso ea mesebetsi.	17
D. Tšebeliso 'moho le Bahoebi.	19
Karolo ea bohllano:	20
A. Leano la Machabeng.	20



“Sera sa Mo tho ke Tlala”



SELELEKELA KA MOETAPELE OA ABC/KOBO-TATA EA BASOTHO

Kobo-Tata ea Basotho (All Basotho Convention) ke lekhlotla la lipolotiki le ngolisitsoeng ka molao. Ke bonyane lilemo tse ts’elelseng ha joale Kobo-Tata e thehiloe e le lekhlotla le lehlo la Bohanyetsi Lesotho. Lekhotla le mothating oa ho ea likhethong tsa Naha tse akaretsang lekhetlo la bobeli ka tatelano ho sebelisa litokelo tsa ho khetha ka bolokolohi ntle ho tsetiso ea letho ka sepheo sa ho hlola e e-ba ‘Muso. Kobo-Tata e nka ho khetha pusong ea Sechaba ka Sechaba e le boiphihlelo bo boholo tokolohong ea Mosotho e mong le e mong ‘me bo lokelang ho tlotloa le ho sireletsoa ka mehla. Meralo eohle ea ABC/Kobo-Tata e itšetlehile holim’a Basotho le Lesotho la Moshoeshoe, mothei oa Sechaba sena ke ka hona e leng boitherisetso ba lekhlotla ho khutlisetsa Letsatsi la la 12 Tlhakubele e le lona la ketekelo ea sehopollo sa Morena Moshoeshoe I.

Ka hona, ABC/Kobo-Tata ka mohoo ona e ikamahanya ka kotloloho le ketso ea Morena Moshoeshoe I ea ho amohela **bokreste** le borapeli ka kakaretso, e le karolo ea bochaba ba Basotho. ‘Me tsohle tse ka hare ho ona li kolla bokresteng li bile li tla phethahatsoa ho ipapisitsoe le **bokreste**. Ka hona ABC/Kobo-Tata e tla loanela ho kenngoa hoa bokreste, Molaong oa Motheo oa Naha ea Lesotho.

Ho fihlela ha joale ke ‘nete ea taba hore se boleloang e le lipolotiki tsa tokoloho naheng ea Lesotho, se sitiloe ho rarolla mathata a Sechaba a kenyeletsang bofuma ba masetla libete; thlokahalo ea mesebetsi, litlolo tsa molao tse tlalehoang le liea-le-moeeng letsatsi ka leng tse kang lipeto, bosholu le lipolaeano. Litšebeliso tse putlameng joaloka phano ea mangolo a ho eta (passport) le tse ling. Ho se khahlametse **maqheku** le **maqhekoana** ka ho ba fa litšebeliso tsa mahala mafapheng a bophelo, e ka sita le khahlametso thlokong tsa **batho ba phelang le bokooa** ‘moho le **likhutsana** le **bahloki**.

ABC/Kobo-Tata e le lekhlotla la Lipolotiki Lesotho e hlokometse tlhokahalo ea botsitso litsing tsohle tsa thuto ho tloha thutong ea mathomo(primary), ka ho khetoloha litsing tsa thuto e phahameng (tertiary level). Lekhotla le hlokomela mathata a teng thutong ea mathomo moo le lumellanang le hore bana ba Basotho ba fumantsoe thuto e sa lefelloeng feela e seke ea ba thuto ea boleng bo fats’e boo bana le litlohlo tsa batho ba pusong ba sa

keneng likolong tse joalo. Hape khahlanyetso e se be feela thutong ea mathomo moo boholo ba Sechaba bo ka khonang ho isa bana likolong ea re moo e leng pharela e leng likolong tse bohareng (High School) ho isa ho tse phahameng (tertiary level) e be ‘Muso o nyahlatsa bana ba Sechaba. ‘Muso oa ABC/Kobo-Tata o tla hlahloba ka hloko e kholo maemo a thuto Lesotho le mekhoha ea ts’ehetso ea lihlapiso ho tloha likolong tse marareng ho isa ho tse phahameng (secondary to tertiary) o ipapisitse le bokhutsana, bohloki le bokhoni ba malapa.

ABC/Kobo-Tata e hlokometse boemo ba ho se khotsofale hoa mafapha a khiri ka karetso. Empa, ka kotloloho mathata a **basebetsi ba lifeme** le mathata a tjametseng **bo-ramakoloi a baeti** ‘me hang hoba ABC/Kobo-Tata e nke puso e tla titima ho sebetsana le mathata ana ka-ofela ho busetsa lintho boemong bo amohelhang.



Mahaeng bothata bo boholo ke tlala ea bojalikata, tlhokahalo ea mesebetsi le tlhokahalo ea tsireletso khahlanong le masholu a liphoofolo ho ba ke libakeng tseo moo tšepo ea Mosotho ea bophelo e leng tlasa temo le liphoofolo. E le ho phethahatsoa mohoo oa ABC/Kobo-Tata o reng **sera sa motho ke tlala**, lekhlotla le tla bopa maano a pheliso ea bofuma le tlala ka ho tšehetsa temo, kanetso ea lijo, kholiso ea moruo ka kakaretso e kaba ka ho bona hore **lirafshoa** tsa Naha li tsoela sechaba sa Lesotho molemo, tlhahiso ea mesebetsi le ntlafatso thutong.

Tlisa phethoho naheng ea Lesotho. Khetha ABC/Kobo-Tata ea Basotho. LA CHABA!!!!

Motsoahae Thomas Thabane
Moetapele oa ABC/Kobo-Tata.

KAROLO EA PELE:

A. TŠEBELISANO 'MOHO LE BORENA KA MAFAPHA A BONA LE HO HLOMPHA BORENA BA LESOTHO

Kobo – Tata ka 'Muso oa eona e tla sebetsa 'moho le borena ba Lesotho ka hlomphe le boikokobetso ka linako tsohle. Kobo – Tata e tla ruta sechaba bohlokoa ba borena le hlomphe ho marena ka mafapha ohle a bona hoba borena ke tšiea ea mantlha ea puso le kopano ea sechaba sa Basotho ho sa natsehe litšekamelot tsa sechaba lipolotiking. Ele ho tsoella pele ho baballa taemane ena eo Basotho ba ikhantšang ka eona Kobo – Tata e tla etsa tse latelang:

1. Ho khutlisetsa Motlotlehi matla ohle ao a neng a ntse a na le ona pusong; ele hofa Motlotlehi matla a ho kena lipakeng ha sechaba se le tsietsing ho tsa lipolotiki le litabeng tsa machabeng;
2. Ho hlomphe puso ea borena, haholo-holo tsamaiso litabeng tse amanang le molao oa Lerotholi o ipapisitseng le meetlo ea Sesotho;
3. Ho tsitsisa puso ea borena le ho khotlaetsa hore borena bo kenye letsoho ka matla pusong ea libaka le meralong ea ntlafatso ea metse;
4. Ho hlahloba litsiane tse fumanoang ke marena; haholoholo tse funoang ke marena a libaka hore li amahangoe le litsiane tsa mak'anselara ka ha kutloisiso ea Kobo-Tata e le hore morena o ka holimo ho mok'anselara hoba borena bo ea tsoalloa ha se ntho ea lipolotiki;
5. Ho rera 'moho le borena liqetong tsohle tse amang Sechaba;
6. Ho etsa hore kemeli mafapheng ohle a puso e be e nepahetseng ea borena; le
7. Ho tšehetsa borena ka koetiso litabeng tsa puso le ntlafatso.

B. MERALO E HLAKILENG EA KABO LE KAMOHO EA MOBU MOLEMONG OA SECHABA NAHA KA KAKARETISO

Mobu ke letlotlo la bohlokoa ho Basotho, o tšoere le hofa matla Mosotho e mong le e mong ho sa natsoe ho ruteha, bofutsana, botsofali, bokhutsana le hoba le bokooa ba mofuta ofe kapa ofe hoba ke lefa le sa boleng. Mme le Basotho ba senang ona bana le tokelo le kabelo ea ho o obeloa ho se kethollo ea letho. Kobo-Tata e itlama ho etsa tse latelang ho batalatsa mabala kabong le kamohong ea mobu molemong oa sechaba:

1. Ho etsa bonnete ba hore likhutsana ha li tsekisoe mobu oa bo tsona ke mang kapa mang;
2. Ho khutlisetsa matla a ho a ba mobu ho makhotla a puso ea libaka joalo ka ha molao o bontšha, e seng boemo bo teng ha a joale boo letona la puso ea libaka le iphileng matla 'me le koetetseng kabo ea mobu ho makhotla a puso ea libaka, e leng se ka thoko ho molao. Ka hoo 'muso oa Kobo-Tata, o tla sebetsa ka matla a molao oa puso ea libaka ho bona hore mobu o abuo hantle, ka toka ho se tšetiso ho mang kapa mang;
3. Ho latela molao o mocha oa mobu oa 2010, melata e na le tokelo ea ho ba le

mobu ka hara naha ea lesotho, rona re le Kobo-Tata ka 'muso o akaretsang oa Naha, re tla hlomathisa molao oo o khopo oa mobu ka tsela e tla etsa hore mobu e be oa basotho feela; le

4. Ho etsa bonnete ba hore batho ba hlolehang ho sebelisa mobu oo ba o abetsoeng ba keke ba amohua mobu, empa ba tla thusoa ka mekhoea eohle hore mobu o joalo o sebelisoe molemong oa bona. Ho latela molao ona o mocha, ha motho a sena hona hore a ka sebelisa mobu, o lokeloa ke ho o amohua.

C. TŠEHETSO TEMONG LE THUOONG EA LIPHOOFOLU (LIHOAI)

Hore temo le thuoo ea liphoofolo li be boemong ba ho phelisa Basotho, 'Muso oa Kobo-tata ea Basotho o tla kenya tšebetsong maano a hlakileng ao ka ona tlhahiso e tla phahama temong le thuoo ea liphoofolo ka sepheo sa ho holisa temo hore fihle boemong ba khoebo le tlhahiso ea mesebetsi. Mme tlhahiso ea boea ba linku le lipoli e tla phahama moruo o hole. Masimo a tla tlohella holala ka bongata. ABC/Kobo-Tata e itlama ho sebelisa maano a latelang ho felisa boemo bona ba tlakotsi ka har'a Sechaba sa Basotho:



1. Ho loantša le ho thibela bosholu ba liphoofolo ka matla e le ho ntlafatsa thuoo ea liphoofolo molemong oa ho bopa boitjaro le boipheliso ho barui ba liphoofolo le ho etsa tlatsetso tlhakahalong ea mesebetsi;
2. Ho ntlafatsa tlhahiso ea moruo o beoang ke liphoofolo, haholo-holo tlhahiso ea boea ba linku, lipoli le tlhahiso ea nama;
3. Ho eketsa le ho beha boemong likiri Naha ka bophara ho qoba litšenyehelo boeeng le ho thusa ho tla ka maono a hlakileng thekisong ea bona molemong oa barui ba likhutšoane.
4. Ho thusa ka katametso ea meriana ho lihoai tsa liphoofolo e le tlatsetso ntafatsong

- ea mehlape;
5. Ho sebelisa liphuputso tsa temo ho khothaletsa Basotho ho lema lijalo tse lumellanang le boemo ba leholimo le tikoloho eo ba phelang ho eona;
 6. Ho tiisa ponaletso le tsosoloso fantising tsa temo;
 7. Ho ntlafatsa molao oa kabo ea mobu;
 8. Ho thusa lihoai ka sepheo sa ho li khothaletsa temo ea khoebo;
 9. Ho atisa litsi tsa noesetso le pokello ea metsi;
 10. Ho baballa tikoloho ka sepheo sa ho ntlafatsa temo ea lifate ho thibela khoholeho ea mobu hohle ka hare ho naha ea Lesotho;
 11. Ho lema lifate tsa litholoana ka sekahla libakeng tse khethehileng (orchards) ka sepheo sa hore tlhahiso e be ngata mme ho be le tlhahiso ea mesebetsi le tikoloho e baballehe;
 12. Ho thusa balemi ba banyenyane metseng e ka thoko ho litoropo;
 13. Ho thusa lihoai ka ho li khahlametsa thekong ea peo, monontša, ho phethola lekote le lisebelisuo tse ling molemong oa hore tlhahiso e phahame moruo o hole;
 14. Ho thusa Sechaba ka ho theha merero ea boikapanyo e le hore masimo a lengoe ka linako tsohle;
 15. Ho tsosolosa bocha litsi tsa thekiso ea tlhahiso ea lihoai ka sepheo sa ho thusa lihoai;
 16. Ho thusa lihoai ka chelete ea likalimo tse khonahalang;
 17. Ho tsosa bocha Banka ea Temo ka sepheo sa ho ntlafatsa le ho tšeetsa kholo temong;
 18. Ho thusa lihoai ka bosupisi bo chatsi;
 19. Ho tlosa tšepo ea Sechaba liphalleng ho ba mphe-mphe e ea lapisa molekane motho o khonoa ke sa ntlo ea hae;
 20. Ho tsosolosa bocha lenaneho la tsoaliso ea lipere tsa lipone molemong oa papalami ba bahahlaoli ka sepheo sa ho bo ntlafatsa;
 21. Ho tsosolosa tšebetso ea litsi tsa noesetso tse kang Mejametalana, Hololo, Tša-li-Tlama, Tsikoane, esita le merero e kang ea Masianokeng moo ho neng ho tšelo a linaoa makolokoting;
 22. Ho ntlafatsa temo Lesotho ka tsela tse tobileng balemi ba banyenyane le ba baholo; le
 23. Ho tsosolosa lirapa tsa kopanelo metseng.

D. THIBELO LE TOANTŠA EA BOSHOLU

Lesotho e le Naha le tlasa khatello ea bosholu, ekaba likhoebong, malapeng le liphoofo-long; ka ho fetisisa mesebetsing ea 'Musu. ABC/Kobo-Tata e le 'Musu e itlama hore e tla ba le maano a latelang toantšong ea bosholu:

1. Ho theha likomiti tsa thibelo le toantšo ea bosholu Naha ka bophara;
2. Ho atolosa tšireletso 'me moo litsi tsa tšireletso li leng hole, boitlamo ke hore li tla atametsoa;
3. Ho bopa likomitjana tse etsang tšalo morao tšebeliso ea lichelete ka hare ho makala a 'musu;
4. Ho etsa litlaleho ka khoeli tse phatlalatsang tšebeliso ea lichelete le hore na li

entse eng;

5. Ho bopa lefapha le ikemetseng la toantšo ea bobolu le bosholu;le
6. Ho tlamella bahlanka boohle ba 'muso ho phatlalatsa maruo a bona e le ho etsa tatello ea hore moo bosholu bo jang setsi ho bonahale.

E. NTLAFATSO EA TOKA, TŠIRELETSO LE PUSO E NTLA

Lekhotla la Kobo-Tata ea Basotho le hlokomela hore kholo ea moruo, botsitso, ho se be teng hoa litlolo tsa molao le boikemelo ba moshoelella tsa Basotho ho ka phethahala feela ha toka le khotso li rena Lesotho. Kahoo, lekhotla le tla etsa tse latelang:

1. Ho hlahloba bocha tšebetso ea makhotla a molao ka sepheo sa ho tiisa le ho potlakisa toka ea sebele Lesotho;
2. Ho etsa melaoana e khethehileng ea ho sireletsa litokelo tsa basali, batho ba phelang metseng e ka thoko ho litoropo, batho ba nang le bokooa, bacha esita le bo-motinyane bao litokelo tsa bona li hatikeloang ka mehla;
3. Ho etsa hore bo-motinyane le bona ba tsebe ho kenya letsoho pusong ea Lesotho;
4. Ho etsa melao e tla sireletsa litokelo tsa basebetsi le ho ntlafatsa likamano tsa bahiri le basebetsi le ho lumellana ka bolokolohi ba ho theha mekhatlo ea basebetsi;
5. Ho theha makhotla a ikhethileng ka mor'a tlhathlombo e batsi ho ahlola linyeoe tsa litsekisano, tlolo tsa melao ea sephethe-phethe, le tse ling ho potlakisa tšebetso ea makhotla;
6. Ho matlafatsa makhotla a tsamaisoang ke marena le sechaba;
7. Ho matlafatsa makhotla a metseng (*local courts*) ka sepheo sa ho anetsa kabo ea toka ho Basotho bohle;
8. Ho anetsa tšebetso ea Lekhotla le Phahameng e potolohang le litereke tsohle tsa Lesotho e tla etsoa ka linako tsohle bonyane khoeli le khoeli;
9. Ho etsa hore likahlolo tsa makhotla khahlanong le 'Musu li hlompheue;
10. Ho isa tšebeletso tse potlakileng tsa puso sechabeng;
11. Ho ntlafatsa tšebeletso ea sepolesa literekeng tsohle tsa Naha le ho matlafatsa mahokela a metse ka sepheo sa boipoleso (*self-policing*);
12. Ho tsosolosa bocha tšebeletso ea likamano tse ntle lipapaling tsa Sepolesa le Sechaba;
13. Ho ntšetsa pele thupelo ea mabotho a hlometseng;
14. Ho tlosa tšekisetso e bonahalang pakeng tsa meputso ea litho tsa makhotla a puso ea libaka le marena;
15. Ho hlompha puso ea borena, haholo-holo tsamaiso litabeng tse amanang le molao oa Lerolitho o ipapisitseng le meetlo ea Sesotho;
16. Ho tsitsisa puso ea borena le ho khothaletsa hore borena bo kenye letsoho ka matla pusong ea libaka le meralong ea ntlafatso ea metse;
17. Ho tšehetsa bolokolohi ba likereke le bolumeli Lesotho;
18. Ho matlafatsa tšebetso ea lekhotla la Thibelo ea Bosholu, Mohlahlobi oa libuka tsa 'Musu, Monamoli, Komisi e Ikemetseng ea Likhetho; le
19. Ho etsa maano a bophatlalatsi ka sepheo sa ho sireletsa bolokolohi ba bophatlalatsi Lesotho.

F. PABALLEHO EA TIKOLOHO LE LIHLOLILONG

Ho fenyha liqholotso tse teng hajoale boemong ba leholimo le tikoloho lefatše ka bophara, Kobo-Tata e tla baballa tikoloho le lihloliloeng e le hore Basotho ba una melemo e mengata paballong le tšebelisoeng e nepahetseng ea limela le liphoofole tse ikhethang tsa naha ka ho etsa tse latelang:



1. Ho etsa hore liphoofole le limela ka mefuta eohle ea tsona li baballoe li be li sireletsoe ke Sechaba molemong oa ho boulela tikoloho ea sona;
2. Ho hlompha le ho ikamahanya le tumellano ea machaba ea thibelo ea tšilafatso ea tikoloho;
3. Ho hlompha le ho ikamahanya le boitlamo le litumellano tsa lefatše, tseo Lesotho le li tekenneng tse tla fetoleloa meralong ea tšebetso, e tla baballa le ho laola tikoloho ka kakaretso;
4. Ho matlafatsa Basotho ho rala le ho tsamaisa merero ea paballo ea limela le liphoofole tse fumanehang moo ba phelang teng;
5. Ho ruta sechaba ka tsa tikoloho le paballeho ea eona ka ho kenyeletsoa thuto e joalo methating eohle ea thuto;
6. Ho etsa melao hammoho le tsohle tse hlokalang ho baballa le ho sireletsa tikoloho joalo ka temo ea lifate;
7. Ho ba hlokolosi hore lintlafatso tsohle tse etsoang li ea hlahlobisisoa hore na li ka ama tikoloho joang; le
8. Ho baballa lihloliloeng tsa naha akofisoeng ea paballo ea tikoloho.

G. TŠEBELISANO 'MOHO LE BA IKARABELLANG HO TSA MEETLO LE BO-KRESTE

ABC/Kobo-Tata e ikamahanya le mekhoha le meetlo ea Basotho 'me ka puso e akaretsang ea Naha e itlamo ho sebetsa 'moho le bohle ba ikarabellang ho tsa mekhoha le meetlo ea Basotho; joalo ka babolli le lingaka, e ka ba tse sebelisang meriana ea sesotho (joalo ka mathuoela) kapa tsa thapelo. ABC/Kobo-Tata e boela e ikamahanya le tsa Bo-kreste e le e 'ngoe ea tšiea tsa mekhoha le meetlo ea Basotho e ka sitana le bolumeli. 'Me pu-



song ea Kobo-Tata tšebeliso le ba tsa meetlo le bokreste e tla ba e latelang:

1. Ho theha melao e tsamaisang le ho laola litaba tsa ba bolli ka babolli e le ho sireletsa seriti sa lebollo e le e 'ngoe ea meetlo ea basotho;
2. Hoba le meralo ea tšereletso le paballeho litlhare ka ho rala le lingaka tse chekang molemong oa hore litlhare tsa Lesotho li se nyamele le hore li tsoele naha ka kakaretso molemo;
3. Ho bopa khokahanyo ho ba ikarabellang ho tsa mekhoha le meetlo ea Basotho e le hore tšebeliso mmoho e be teng lipakeng tsa bona le lingaka tsa sekhoaa;
4. Ho boulela Bo-Kreste e le e 'ngoe ea tšiea tsa mekhoha le meetlo ea Basotho;
5. Ho se etse meralo e hatikelang Bo-Kreste;
6. Ho rupella ba tsa meetlo ka tsa khoebo e le mokhoa oa ho susumelletsa boitjaro le popo ea mesebetsi.

KAROLO EA BOBELI:

A. KATAMELO EA ABC/ KOBO-TATA HO BATHO BA NANG LE BOKOOA

Kobo-Tata e hlokomela le ho amohela bohlokoa ba batho ba nang le bokooa ba mofuta ofe kapa ofe sechabeng sa basotho. 'Me lekhotla le ikemiselitse ho ba le tšebeliso mmoho le malapa 'moho le batho bohle ba nang le bokooa mafapheng ohle; e ka ba motho ka bo mong kapa batho ba joalo ba ipopile ka mekhatlo ea bona. Merero ea mantlha ea Kobo-Tata pusong ea eona ke:



1. Ho bokella, ho buella le ho sebetsa litaba esita le tsa batho ba nang le bokooa le ho sireletsa litokelo tsa bona;
2. Ho sebeletsa kamohelo le ho kenyeletsa batho ba nang le bokooa sechabeng, hore ebe karolo ea sechaba e ka ba lipolitiking, ho tsa moruo ka ho lekana le ka botlalo;
3. Ho fana ka tšehetso ho batho ba nang le bokooa ho ba thusa ho kenya letsoho litabeng tsohle tsa sechaba;
4. Ho koetlisa batho ba phelang le bokooa, hoba fumantša setsi sa tlhabollo e ka ba batho ba banyane le ba baholo lilemong ba tsebe ho fumana mekhoha ea ho iphelisa le thuto;
5. Ho fetola le ho ntša sekhoobo se manamisitsoeng batho ba nang le bokooa ka metso;
6. Ho etsa maano a amohelang le melao e tšireletsang litaba-tabelo tsa batho ba nang le bokooa;
7. Ho tšehetsa mananeo a lebisitsoeng ho phahamisa ba nang le bokooa;
8. Ho fana ka koetliso ea mesebetsi ea matsoho ho batho ba nang le bokooa;
9. Ho haha litsi le likolo tsa batho ba nang le bokooa Naha ka bophara; le
10. Ho felisa melao ea khethollo ho batho ba nang le bokooa e kang molao o fetesitsoeng

ka paramenteng o reng bana ba nang le bokooa ba khaoleloe litšiu pele ba fihla lefatšeng ha feela leseea le joalo le hlokomehile.



B. KATAMELO EA TABA TSA BACHA KA ABC/ KOBO-TATA

Kobo-Tata e le lekhotla la lipolotiki e hlokomela mathata a tjametseng bacha Naha ka bophara; tlhokahalong ea mesebetsi, tabeng tsa thuto, bothata ba moo bacha ba bapallang e ka sita le ho ithapollella le moo ba ka rupelloang ka kholo e nepahetseng le bochaba ba bona. Ka hoo Kobo-Tata pusong ea eona e itlama ka tse latelang:

1. Ho kenyeletsa bacha liqetong le meralong e ka sita le bophethising ba liqeto le meralo ea Naha e ka ba thutong, lipolotiking, kholisong ea moruo ho bacha khoepong le kholiso ea bacha ka kakaretso mafapheng ohle;
2. Ho fetola boitšoaro ba bacha ka ho menahana le mehlala ka ho qopitsa kholiso ea khale haholoholo tse bohlokoa tsa eona tse ka bopang bacha ba bohlokoa ba ka moso ba ka etellang naha pele ka moso;
3. Ho lokisa le ho tšireletsa litsi le mabala a lipapali le bothapallo;
4. Ho kenyeletsa bacha ho nka karolo tabeng tsa likhakanyo tsa lichelete tsa naha;
5. Ho ba le meralo ea ntlafatso le kholiso ea lipapali ka mokhoa oa khoebo e le e ngoe ea tlhahiso ea mesebetsi ho bacha;
6. Ho bopa botsitso ka hare ho litsi tsa koetliso e ka ba likolong tsa mathomo, tse mahareng le tsa thuto e phahameng e le ho matlafatsa boemo ba thuto Lesotho;
7. Ho sebeletsa ho ntlafatsa bacha ka ho sebeletsa ho fihlela sepheo sa chebelo-pele Sechaba sa Basotho ea 2020 (*Vision 2020*).
8. Ho fana ka koetliso ea mesebetsi ea matsoho ho balisana, likhutsana le bana ba tlokotsing le bacha ka kakaretso;
9. Ho eketsa palo ea bacha ba nang le litsebo le ba koetlisitsoeng ka hara Naha ka ho ela hloko hore phetsetsano ea litsebo (*skill transfer*) le tšeetso ea litsiane tsa thuto ho bacha li lula li le teng;
10. Ho sebelisa setšoantšo sa molao oa Thuto le ho ntlafatsa maano a thuto a amanang le ho akofisa litaba tsa thuto mafapheng a amehang molemong oa bacha le naha ka kakaretso;
11. Ho ruta bacha ka tsa HIV le AIDS ka ho kenyeletsa thuto ena kahara thuto ea letsatsi le letsatsi ea sekolo le ka nako ea kamora sekolo, mohlala ka lihlopha (*Clubs*) tse fapaneng tsa baithuti ele mokhoa oa ho anetsa le ho atisa thuto ea ho fokotsa mekhoha e beang baithuti kotsing;
12. Ho atisa thuto le melaetsa e nepahetseng ho bacha, le ho thusa bacha ka ho qoba maemo a kotsi 'me ba fuoe litsebo tsa ho fokotsa ho ipeha kotsing.
13. Ho fana ka tsebo le thuto ho balisana, likhutsana le bana ba tlokotsing. Litsebo tsa mesebetsi ea matsoho le koetliso ho balisana, likhutsana le bana

ba tlokotsing ha 'moho le malapa a bona;le

14. Ho matlafatsa bacha metseng le litoropong ka mesebetsi e kenyang chelete, tsamaiso ea khoebo, bohahlauli le temo le thuo ea liphoofole ka sepeho sa tlhahiso ea mesebetsi ho fenyha bofuma.

C. BOPHELO BO BOTLE LE BOIKETLO BA SECHABA

Ho tliša tšebeletso tsa bophelo bo botle ho Basotho bohle haholo-holo litšebeletso tsa ho thibela mokakallane oa setla-bocha (HIV/AIDS), le ho thibela mafu a bolaeang bakhachane le masea, esita le bana, lekhotla la Kobo-Tata le tlia etsa tse latelang:



1. Ho beha ka sehlohlolong khiri le paballo ea litsebi tsa bophelo bo botle litsing tsohle tsa bophelo;
2. Ho phethahatsa ntlafatso ea litsi tse ling tsa bophelo tse reretsoeng hore li tle li sebeletse tse ling ka botsebi bo pharaletseng (*referral hospitals*);
3. Ho ntlafatsa litšebeletso tsa tšohanyetso tsa mollo le likotsi (*fire brigade and ambulance*) le makala a shebaneng le likotsi lipetlele (*accident and emergency departments*);
4. Ho theha seahlolo se babatsehlang le lingaka tse itšebetsang ka sepheo sa ho alosa, ho oka le ho laola mafu a sa phekoheng a kang tsoekere (*chronic illnesses*);
5. Ho sireletsa basebetsi likotsing, litsing tsa tšebetso;

6. Ho fumantša bakhachane litšebeliso tse sa lefelloeng;
7. Ho kenya letsoho ka matla thibelong ea tšebeliso e mpe ea tai, koae le lithethefatsi ka mefuta;
8. Ho phatlalatsa litaba tsa bophelo bo botle ka hohle-hohle;
9. Ho theha manane a macha molemong oa batho ba nang le bokooa hore ba tsebe ho itjara le ho lokisa menyako eohle ho ba nolofaletsa ho kena;
10. Ho beha sehlohlolong paballo ea bana le ho ntlafatsa tšebeliso tsa pelehi;
11. Ho hata ka matla toantšong ea lefu la mokakallane oa setla-bocha (HIV/AIDS), lefuba (TB), lefu la tsoekere le a mang re shebile haholo thibelo ea ona, kalafo ea bakuli le thupelo ea litsebi tsa bophelo le baoki;
12. Ho ntlafatsa liphatlatso tsa bophelo bo botle ka sepheo sa ho sala morao litšebeliso tsa bophelo ba Sechaba le ntlafalo ea bona;
13. Ho theha litsi tse ncha tsa bophelo moo li hloka halang haholo
14. Ho fana ka litšebeliso le kalafo ho maqheku (60 years) litsing tsohle tsa bophelo (litleliniki le lipetlele) tsa 'Musong, ntle le tefiso ea letho.
15. Ho ntlafatsa sekolo sa thuto tsa bophelo le ho theha sa bongaka; le
16. Ho theha le ho ntlafatsa litsi tsa bophelo tse tsamaeang joalo ka *Lesotho flying doctor service*.

D. NTLAFATSO EA THUTO

Lekhotla la Kobo-Tata le lumela hore Basotho ba tsoanetse ho fuoa thuto e sa lefelloeng ke batsoali ka kotloloho. Empa le ha ho le joalo, boemo ba thuto Lesotho bo hloka ntlafatso e potlakileng hore thuto e tle e tsebe ho arabela lithoko tsa naha e ipapisitse le boemo ba lefatše ka kakaretso, 'Musong oa Kobo-Tata o tla etsa liphetoho tse latelang:



1. Ho hlopha bocha lekalana la meralo la lekala la thuto;

2. Ho hlopha bocha manane-thuto ka sepheo sa hore thuto ea Lesotho e arabele litlhoko tsa naha le ho phahamisana boemo ba eona ka hare le kantle ho naha;
3. Ho ntlafatsa thuto ea likonyana;
4. Ho matlafatsa bohlahlobi le tsamaiso ea likolo;
5. Ho phahamisana lenane la bana ba lilemo li tharo ho isa ho tse tšeletseng likolong tsa likonyana le tsa mathomo;
6. Ho ntlafatsa manane a bana ba rutoang ke tichere ka nngoe;
7. Ho eketsa manane a baithuti likolong tsa thuto ea mesebetsi ea matsoho le ho aha bonyane sekolo sa 'Musong sa thuto ea mesebetsi ea matsoho seterekeng se seng le se seng;
8. Ho ntlafatsa manane-thuto a likolo tsa thuto ea mesebetsi ea matsoho hore a tle a ikamahanye le litlhoko tsa lifeme le mesebetsi e meng e meholo ka har'a Naha;
9. Ho theha likolo tsa thupelo ea matichere literekeng tse ling tsa Naha ka sepheo sa ho isa litšebeliso sechabeng;
10. Ho hohela baithuti ba qetileng lithuto tsa bona hore ba sebetse ka har'a Naha le ho khothaletsoa ho theha mesebetsi;
11. Ho matlafatsa litsi le manane thuto a batho ba phelang le bokooa;
12. Ho theha selekane sa nnete le likereke molemong oa thuto ea bana ba Sechaba;
13. Ho ntlafatsa thuto ka sepheo sa ho tšehetsa lipapali, tsa kalaneng, botaki, boqapi, mmino, meetlo le mekhoha ea Basotho hore bohahlauli bo tle bo je setsi Lesotho;
14. Ho ruta le ho sebelisa botsebi ba mahlale le tekheniki ho akofisa li ntlafatso mahaeng.

Meralo ena kaofela e tla thusa ho fetola thuto likolong hore e ke e fe Basotho litsebo tseo ka tsona ba tla tseba ho itšoarella ka matsoho mafapheng a fapaneng a mesebetsi.

Khetha Kobo-Tata hoba ke lona lekhlotla le tla fana ka tiisetso ea thuto e sa lefelloeng ke batsoali ka kotloloho le ho etsa hore thuto e arabele litlhoko tsa Basotho le naha ea bona.

KAROLO EA BORARO:

A. BOSEBELETSI BA SECHABA 'MUSONG

E le hobane ho hlokomelile hore ba bang ba babusi ba sebelisa boikhabo mme ba khahana le litaba-tabelo tsa Sechaba ka ho iketsa majalefa a puso ea Lesotho; mme sena se tlisitse bosebeletsi bo bobele ba Sechaba mafapheng ohle a 'musong hoba basebetsi ba nyahame lipelo ka lebaka la tsamaiso e mpe, litsiane tse soabisang le ho sa fumantšoe lithupelo ho ba tsosolosa hore ba fane ka bosebeletsi bo tsoileng matsoho, lekhlotla la Kobo-Tata le rerile ho etsa tse latelang ha le nka marapo a puso:

1. Ho qoba ho ipokella ka meputso e holimo ea lipenshele ha litho tsa eona li ea phomolong ka ha naha e futsanehile;
2. Ho phatlalatsa maruo a maparamente le liofisiri tse boholong 'Musong;
3. Ho se etse matona a mangata ka ha naha ea Lesotho e le nyane e sa hloke matona a mangata;
4. Ho fokotsa litjeo tsa boleng ba makoloi a sebelisoang ke matona mmoho le bongata ba ona;

5. Ho hlahloba bocha meputso le litsiane tsa basebeletsi ba Sechaba;
6. Ho hlahloba bocha koetliso ea basebeletsi ba sechaba ka sepheo sa ho ntlafatsa litsebo tsa bona e le ho akofisa tšebeliso tse tsoileng matsoho sechabeng;
7. Ho matlafatsa tšebeliso mechine ea li-computer le mekhoea e meng ea sejolejoale ea tšebetso 'Musong ka sepheo sa ho ntlafatsa basebeletsi ba sechaba bo potlakileng;
8. Ho sireletsa bolokolohi ba basebeletsi ho theha mekhatlo ea basebetsi ka tsela eo basebeletsi ba Sechaba bo senang ho nyehla;
9. Ho theha mekhoea e chatsi ea therisano pakeng tsa bahiri le basebeletsi;
10. Ho hlahloba bocha tšalo morao ea tšebetso ea basebeletsi ba Sechaba;
11. Ho fa Sechaba se phelang metseng e ka thoko ho litoropo matla a ho hlokomela hore se fumana basebeletsi bo botle ka nako tsohle mme le ho bona hore baemeli ba sona ba phetha mosebetsi joalo ka ha ba lebeletsoe;
12. Ho bona hore Sechaba se tseba ho ikhethela le ho itherele merero ea ntlafatso;
13. Ho thoholetsa le ho khothletsa mafolo-folo basebeletsing ba Sechaba, mme ho behoe litaba-tabelo tsa Sechaba pele-pele meralong le mererong ea makala a 'Musu;
14. 'Musu oa ABC ka therisano le basebetsi ba sechaba ka bo mong le ka mekhatlo ea bona bat la shebisana polokelo ea lichelete (mohlala: *compulsory savings*).

Bosebeletsi ba Sechaba bo lebeletsoe ho phethahatsa litlhoko tsa mantlha tsa Secha ba haholo metseng e ka thoko ho litoropo. Le ha lekhotla la Kobo-Tata le hlokomela hore khomo ha li kae batho re bangata, re tseba hore ka khomo tse teng re ka tseba ho ntlafatsa bophelo ba Sechaba ha re ka li sebelisa ka hloko e kholo.

Lekhotla la Kobo-Tata le tla nka mehato e matla ka batho batla sebelisa thepa ea Sechaba hampe le ho se sitisa ho fihlela litaba-tabelo tsa sona. 'Musu oa Kobo-Tata o tla ithuta ka liphoso tsa mebuso e fetileng, hoba Maele a Sesotho a re: "monna ha a bone habeli". Kahoo tšehetsa lekhotla la Kobo-Tata hoba le utloisisa litaba-tabelo tsa Basotho le se hlokalang ho li phethahatsa.

B. TSA KHIRO LE BOSEBETSI BA BATHO BA SEBETSANG LIKHOEBONG TSE IKEMETSENG, LIFEMENG ESITA LE MALAPENG

ABC/Kobo -Tata e ithutile le ho hlokomela mathata a tjametseng basebetsi mafapheng a likhoebo tse ikemetseng, lifemeng e ka sita le malapeng mme lekhotla la Kobo-Tata le rerile batalatsa maemo a tšebetso ka ho etsa tse latelang pusong ea lona:



1. Ho etsa bonnete ba hore meputso le maemo a tšebetso ea basebetsi ba lifemeng e ea ntlafala ho tloha boemong boo e leng bona hajoale;
2. Ho etsa meralo e hlakileng e bileng e latelloang ea lipatala tsa basebetsi ba lisho pong, malapeng le khoepong tsa makoloi;

3. Ho etsa bonnete ba hore melao ea naha e ea lateloa mabapi le matsatsi a tšebetso ho ipapisitsoe le bahoebi ba sa natseng matsatsi a phomolo a naha (haholoholo melata) e sa ikamahanyeng le melao e joalo;
4. Ho chakela molao oa matšelisano oa likotsi tsa mosebetsing hore ha feela motho a hla heloa ke kotsi a le mosebetsing a ntse a etsa mosebetsi motho a joalo a fuee matšelisano (*workman's compensation*) ho fapana le boemo ba ha joale bo reng motho a fuee matšelisano ha fela kotsi e hlalositse bokooa;
5. Ho etsa hore basebetsi ba sebetse lihora tsa molao le moo ba sebetsang hofeta ba patalloe nako e joalo ho latela molao;
6. Ho etsa bo'nete ba hore basebetsi boohle ba fumana matsatsi a phomolo a tsoanang bakeng sa pelehi;
7. Ho etsa bo'nete ba hore litokelo tsa basetsi ba mmaene li ea sireletsoa le mathata a bona a ea rarolloa ka ntle le ka hare ho Naha ea Lesotho;
8. Ho khothaletsa bahoebi ho patala basebetsi ka mekhoea ea ha joale e nang le pona letso e le hore ho hlake hore patala e molaong; le
9. Ho sireletsa basebetsi ba lifeme ka hore ho be le peho selibeng ea chelete hosire letsa basebetsi e le hoqoba se hlokomelohileng ke Kobo-Tata ea bo rakhoeba ba melata ba nyamelang ka lichelete tsa Basotho.

KAROLO EA BONE:

A. KOMITI EA MERALO EA NTŠETSO PELE EA NAHA (National Planning Board)

Ele ho bopa meralo e hlakileng e tlang ho ntšetsa pele Naha moruoong ABC/Kobo-Tata e tla theha komiti ea Naha ea meralo, ntlafatso le tsamaiso. Komiti e tla ikarabella tsamaisong ea maano a kholiso ea naha ka kakaretso e ka ba kabong, tšebeliso le tlalehong ea lichelete tsa Naha ka ho etsa tse latelang:

1. Ho hlopa meralo ea ntlafatso ea moruo Lesotho, ho kenyeletsa ntlafatso, tšireletso ea mobu, lihloholoeng le lirafshoa molemong oa sechaba ka kakaretso;
2. Ho hokahanya, ho fana ka bosupisi le ho eletsa 'Musu oa Lesotho le litsi tsohle tsa tšebeliso ea sechaba tse amanang le tlhabollo le kholiso ea moruo;
3. Ho eletsa 'Musu oa Lesotho mabapi le maano hahoholo a amanang le mobu le phano le kabo ea mobu; le
4. Ho rala tšebeliso ea lichelete tsa sechaba ho ipapisitsoe le tse raliiloeng ke komiti ea meralo joalo ka ha komiti e joalo e le teng ka molaong oa Naha.

B. NTLAFATSO LE KHOLISO EA MORUO MOLEMONG OA BASOTHO

E le ho etsa hore Lesotho e le Naha le rue ho isa mengoaheng ea mengoaha mme moruo lona e be o tlokomang, o nang le mesebetsi e meholo e matla, o tla be o sebelisa lihlahisoa tsa naha ka botlalo le lihloholoeng tse kang litaemane, metsi, lejoe esitana le lirafshoa tse ling, molemong oa Basotho bohle le ho bopa menyetla ea mesebetsi, pheliso ea tlala le bofuma, 'me Lesotho le tsebe ho hohela Basotho mesebetsing e kahar'a Naha

ABC/Kobo-Tata e tla etsa tse latelang:

1. Ho laola lirafshoa ka hara Naha molemong oa Sechaba; Lesotho e le naha le na le lirafshoa tse ngata haholo (joalo ka litaemane, lejoje la lesehloa, koari le lehlabathe



joalo - joalo), tseo tse ling tsa tsona li so sibulloeng mme ABC/Kobo-Tata e lumela hore ha li ka laoloa ka nepo li ka bang le molemo ho Sechaba sa Basotho le ho tlisa lintlafatso.

Boitlamo ba Kobo-Tata ha e le 'Muso, ke ho ba le lethathamong la lirafshoa tsohle Naha ka bophara; ho bokelloe maikutlo a Sechaba hore na lirafshoa li sebelisoa joang le ho laoloa joang. Kobo-Tata e tla etsa tlaleho sechabeng hore na ka kareretso ea lichelete tse bokelloang merafong ea li taemane Lesotho ke bokae ka selemo. 'Me chelete e joalo e tla tsoela Sechaba soohle molemo ka mokhoa o hlakileng joalo ka Naha tse ling tsa SADC le tsa African Union;

2. Ho etsa tlaleho ea tse fihletsoeng kabong le tšebelisoeng ea lichelete tsa sechaba (*Budget Speech*) selemo ka seng pele ho kabo bocha ea lichelete tsa 'muso;
3. Ho tlalehela Basotho ka hore na lipokello tsa makhetho li sebelisoa meralong efe ea Naha selemo le selemo (*collections on tax and non-tax revenues*);
4. Ho kenya tšebetsong lekhetho le tla lumella kholo ea moruo oa Basotho e ka bang ke ea motho ka mong, likhoebo tse nyenyane joalo ka tsa baitšokoli le tse kholo;
5. Ho potlakisa ho kenya tšebetsong molao oa nyehlisoe ea lekhetho ho ba kentseng letsoho ho tšehetsa, ka lichelete, lipapali le mekhatlo ea boithatelo bo botle ea boithaopi;
6. Ho se khafise batho ba amohelang chelete e ka tlase ho M2,500.00 ka khoeli;
7. Ho hlokomela le ho etsa bonnete ba hore chelete ea machabeng e amoheloang ke lifeme tsa Lesotho ka mor'a thekiso ea thepa machabeng e romelloa hae Lesotho ha

e ee naheng tseo batseteli ba tsoang hotsona pele e tla Lesotho;

8. Ho thusa bahoebi ba Lesotho ho kenya letsoho khoebong ea lifeme e le hore qetellong tlhahiso ea lifeme boholo e tsoe ke Basotho mme chelete tsa machabeng litle Lesotho;
9. Ho tlosa likhoqetsi tsohle tse thibelang Basotho ho khenya letsoho kholisong ea moruo oa Naha ea habo bona haholo lirafshoeng;
10. Ho hlahloba bocha tšebetso ea libanka le litsi tse ling tse hoebang ka chelete ka sepheo sa ho holisa lipolokelo tsa Sechaba ho kenyeletsoa le thatlhobo ea makhetho holim'a tsoala ea lipolokelo le litsiane tsa batho ba beang meja faatše;
11. Ho theha Banka ea Ntšetso Pele (*Development Bank*) ho thusa bahoebi haholoholo ba banyenyana kholong le kholisong ea likhoebo tsa bona;
12. Ho koetlisa mafapha ohle a Baitšokoli le ho ba fa botšehetsi ka lichelete ho qala likhoebo;
13. Ho busetsa tšebetsong lipolokelo tsa Basotho ba sebetsang merafong tjee ka ha ekile ea etsoa lilemong tse fetileng;
14. Ho hlahloba bocha litefiso tse etsoang ke libanka likalimong ka sepheo sa ho isa litšebeliso tsa libanka sechabeng e seng ho imetsa Sechaba joalo ka boemo bo teng hajoale boo Basotho ba ingoetsoang ha ba batla mekoloto libankeng;
15. Ho etsa linyehlisetso tsa lekhetho ka sepheo sa ho khothaletsa bahoebi ho koetlisa basebetsi le ho ntlafatsa boiketlo ba bona;
16. Ho aha likamano tse ntle le linaha tsa SADC, haholo-holo Africa-Boroa, ka sepheo sa ho holisa moruo oa Lesotho le ho qhaqholla mathata a mangata ao Basotho ba kopanang le oona ha ba tšela malibohong;
17. Ho ntlafatsa meetlo le bochaba ba Basotho ho akaretsoa mmino, botaki le tse ling ka sepheo sa ho hohela bahahlaoli ;
18. Ho etsa leano le akaretsang kholisong ea lipapali, e le mokhoa oa ho sebelisa lipapali ka mofuta ho hlahisa mesebetsi, ho kopanya le ho aha sechaba sa Basotho hore se be ntsoe leng litabeng tsa tsoelopele ho kenyeletsoa le lipapali tsa bochaba ba Basotho tse kang morabaraba, tšipho, ntlamo, mohobelo le tse ling;
19. Ho koetlisa basebetsi ba litsi tse amohelang bahahlaoli ho ba lokisetsoa ho kenya letsoho kholong ea bohahlaoli hloahloeng ena ea Africa; le
20. Ho ntšetsa pele seabo sa Lesotho khokahanyong ea moruo le linaha tse ling.

C. KAHO EA LITŠIEA TSA MORUO E SITA LE TLHAHISO EA MESEBETSI

Kaha kaho ea litšiea tsa moruo e ka hlahisa mesebetsi mme ea ba ea isa litšebeliso sechabeng, Lekhotla la Kobo-Tata ea Basotho le rera ho etsa tse latelang:

1. Ho etsa hore maano a ho fenyha bofuma e be a mantlha mme kaho ea liemahale tse kang litsela, marokho, matamo le tse ling e be ea mantlha meralong ea Naha ka sepheo sa ho betlela Basotho mesebetsi;



2. Ho etsa melao e tla baballa bophelo bo botle ba basebetsi litsing tsa tšebetso le ho thibela khiri ea bana esita le khethollo ea mofuta ofe kapa ofe mesebetsing;
3. Ho ntlafatsa lipenchene tsa maqhekoana le ho qala lilemo tsa boqheku ho tloha ka li lemo tse mashome a tšeletseng (60 yrs); le ho eketsa litsiane hotloha ho M350.00 e fanoanoang hajoale ho ea ho M600.00;
4. Ho etsa meralo e tla thusa basebetsi ha ba lahlehelo ke mesebetsi le ho ba sire letsa tšebeliso ea bokhoba. 'Muso oa lekhota la Kobo-tata o tla kenya tšebetsong mokotla o tla phallela basebetsi ba lahleheloang ke mesebetsi;
5. Ho sebelisa lihlahisoa tsa Lesotho kahong ea liemahale joalo ka tšebeliso ea lejoe khahong ea tse ling tsa liemahale;
6. Ho hlahloba bocha tšehe le phano ea litša metseng e ka thoko ho litoropo;
7. Ho potlakisa phepele ea motlakase metseng e ka ba o fehloang kapa oa letsatsi;
8. Ho potlakisa phepele ea motlakase, 'Muso oa Kobo-tata ea Basotho o tla pharalatsa lithapo tsa motlakase ka bophara ba Naha mme o tla hlahloba le mekhoe e meng ea ho fehla motlakase e kang tšebeliso ea Letsatsi, metsi kapa moea;
9. Ho potlakisa ntlafatso ea litšebeliso le phepele ea metsi metseng ea litoropo le e seng ea litoropo (*Urban-Rural Water Supply*), litšebeliso tsa likhoere-khoere, metsi a litšila le kaho ea matloana;
10. Ho hlahoba litefiso tse fapaneng pakeng tsa metse ea litoropo le metse e ka thoko ho litoropo;
11. Ho ntlafatsa litšebeliso le likhokahanyo tsa mehala ea faatše le ea letsoho ka bophara ba Naha;
12. Ho aha litsela le seporo sa terene ka sepheo sa ho ntlafatsa khoebo ea Lesotho le Naha tsa SADC e sita le linaha tse ling lefatše ka ho pharalla;
13. Ho ntlafatsa litsela le liemahale tse ling metseng e ka thoko ho litoropo ka sepheo sa ho ntlafatsa bophelo ba basali, bacha le ba batho ba nang le bokooa libakeng tseo;
14. Ho beha sehlohlolong maano a ho baballa litsela le thibelo ea likoluo;
15. Ho hlahloba bocha tšebetso ea makoloi a baeti haholo a sebelisoang ke basebetsi ba lifeme;
16. Ho etsa moralo o mocha oa boipaballo mebileng;
17. Ho ntlafatsa tšebetso ea lipalangoang ho kenyeletsoa paballo ea maphelo le thuto ea baqhobi le basebelisi ba lipalangoang;
18. Ho aha likolo le litsi tsa bophelo moo li hlokoang teng ho se khethollo;
19. Ho ntlafatsa mabala a lipapali literekeng tsohle ho akarelletsoa le ho aha litsi tse ikhethileng tsa boikoetliso (joalo ka setsi sa boikoetliso ka maloting – *high altitude fitness centre*) e le ho khothaletsa tsoelopele ea lipapali le bohahlaoli bo ipapisitseng le tsona lipapali;
20. Ho anetsa litšebeliso tsa lekala la sephethe-phete literekeng kaofela;
21. Ho ntlafatsa tšebetso ea ho fana ka lilakesense tsa boqhobi le tsa makoloi;
22. Ho hlahloba bocha tsamaiso le litšebeliso tse amanang le makoloi a 'Muso, ka sepheo sa ho imolla Basotho tumellanong ea hajoale e hanyang Sechaba ka sepheo sa ho khothaletsa 'Muso ho ithekela makoloi ao e leng a ona; le
23. Ho sebelisa litsi tsa bahoebi ho lokisa koloi tsa 'Muso.

D. TŠEBELISANO 'MOHO LE BAOEBI

E le ho lokisa boemo bo teng ha joale ba tlala, tlhokahalo ea mesebetsi le ho hloka botšeetsi ho bahoebi ABC/ Kobo-Tata, e le 'Muso e tla ba le leano la tšebeliso 'moho le bahoebi ba banyenyane le ba baholo ho kenyeletsoe baitšokoli le bahoebi ba makoloi a baeti ka ho etsa tse latelang ho tsa khoebo:



1. Ho ba le tšebeliso 'moho le bahoebi ka kakaretso; le ho bopa sethabathaba sa phumantšo ea likalimo tsa lichelete hammoho le taolo e ntle ea mekhoe ea ho kalima le ho lefa melato e tla ba tsona litšiea tsa ntlafatso le kholiso ea likhoebo tse nyenyane le tse mahareng 'moho le baitšokoli hohle ka har'a Lesotho;
2. Ho batalatsa mabala hore boemo ba khoebo le tsamaiso e be bo amohelang ho holisa moruo le boitjaro;
3. Ho hokahanya Lesotho hore le sebetse 'moho le linaha tse ling ho tsa khoebo, matsete le ntlafatsong ea moruo ka kakaretso;
4. Ho tšehetsa bacha ho iqalla likhoebo ho fenyha tlhokahalo ea mesebetsi;
5. Ho batalatsa mabala hore phumantšo ea lilakesense e ba boemong ba machaba ho akofisa kholiso ea khoebo Lesotho;
6. Ho batalatsa mabala a khoebo tse kholo ka sepheo sa ho hohela bo-ramatsete feela ho ntse ho sirelelitsoa litokelo tsa Basotho ka ho laola litholoana tse beoang ke khokahanyo ea lefatše esita le phetisetso ea likhoebo tsa 'Muso ho Sechaba;
7. Ho tšehetsa bohahlauli ele khoebo le molemong oa ho theha mesebetsi ka sepheo sa pheliso ea bofuma le kholiso ea moruo;
8. Ho batalatsa mabala hore pokello ea lekhetho e etsoa hantle ka ho rupela bahoebi ka lekhetho le molemo oa lona le ho tlaleha tse fihletsoeng ke 'Muso pokellong e joalo;

9. Ho hlahloba tšebetso ea ho fetisa likhoebo tsa 'Muso sechabeng bocha;
10. Ho etsa bonnete hore melao le melaoana ea khoebo e ea lateloa ho sireletsa likhoebo tsa Basotho ka ho tšehetsa Bahoebi ba Basotho metseng, metsaneng le litoropong, melata e felle mesebetsing e meholo feela (melata e tsoe metseng e be likhoebong tse kholo joalo ka ha molao oa khoebo o bolela); le
11. Ho tšehetsa le ho sebelisana mmoho le bahoebi ba koloi tsa baeti.

Boemo ba moruo ka kakaretso, khiri, likhoebo tse nyenyane le tse mahareng, hammo-ho le mafapha a ikemetseng, esitana le katleho moruong, ke tsona lintlha tsa bohlokoa chebelong-pele ea Kobo-Tata e ipapisitse le **CHEBELO-PELE EA SECHABA SA BASOTHO EA 2020 (Vision 2020)**.

KAROLO EA BOHLANO:

A. LEANO LA MACHABENG

Ha lekhotla la Kobo-Tata le nka marapo a puso, Lesotho le tla sebeletsa khotso lefatšeng tlasa leano la tlhomphano le tekano ea linaha tse se nang bompoli, ntlafatso ea puso ea Sechaba ka Sechaba, boahelani ba Khotso, tharollo ea likhohlano ka Khotso, tlhompho ea meeli le bolokolohi ba linaha, le paballo ea litokelo tsa mantlha tsa botho.

E le ho netefatsa hore Lesotho e sala e le naha e hlomphehang har'a linaha tsa lefatše, Lekhotla la Kobo-Tata le tla etsa tse latelang:

1. Ka sehlohong e tla ba ho boloka maqhama a tiileng le likamano tse mofuthu le Naha ea boahelani, naha ea Afrika Boroa le ho fumanela Basotho bolokolohi ba ho tšela malibohong le ho fumana mesebetsi naheng eo;
2. Ho ntšetsa-pele botho ba Lesotho mekhatlong ea tikoloho le ea lefatše e kang Mokhatlo oa Khoebisano linaheng tse ka Boroa ho Afrika (SACU), Mokhatlo oa Ntla fatso ea Moruo tikolohong ea Afrika e ka Boroa (SADC), Mokhatlo oa Kopano ea Li naha tsa Afrika (AU), Mokhatlo oa Linaha tsa Selekane (Commonwealth), Mokhatlo oa Linaha tsa Afrika, Caribbean le Pacific (ACP), le Mokhatlo oa Machaba a Kopaneng (UN) mmoho le makala a ona a kang UNESCO, WHO, UNICEF le a mang a kang UN, HCR, WTO le ILO;
3. Ho hlompha le ho ananela litumellano tse tekennoeng ke Lesotho le machaba molemong oa Basotho;
4. Ho theha le ho boloka maqhama a selekane le a khoebisano le linaha tse tsa maisoang ka puso ea Sechaba ka Sechaba, tseo Lesotho le nang lethahasello ho tsona;
5. Ho hlompha le ho boulela moelelo oa tumellano ea Vienna (*Vienna Convention on Diplomatic Relations*) litabeng tsa maqhama a selekane; le
6. Ho matlafatsa basebetsi ba sebetsang lekaleng la tsa machabeng, hae Lesotho, eka sitana le liofising tsa Lesotho tse linaheng tse nang le likamano le Lesotho. Pele batho ba joalo ba kena mosebetsing batla fumantšoa koetliso e hlokahalang; le
7. Ho hlompha litumellano tse teng tsa machaba tse molemong oa Sechaba sa Basotho tse kang *Kyoto Protocol*.





ABC Offices
3rd Floor, Carlton Centre
Kingsway Road
Maseru, Lesotho